

E ta esepshonal, fasinante i e ta aki. Eklipse solar di Kòrsou.



Tur kurpa ku haña lus riba dje na kualke un di su bandanan, ta produci un sombra tras di dje, den direkshon kontrali di kaminda e lus a bini. Ora sombra di Tera kai riba Luna, esei ta produci un eklipse di Luna, pero ora lo kontrali sosodé, esta sombra di Luna kai riba Tera, nos ta papia di eklipse di Solo.

Un eklipse di Solo por tuma lugá solamente ku Luna Nobo, ora esaki bai para entre Solo i Tera.

Pero no ta tur luna tin eklipse; solamente ora e tres kurpanan di shela ei bai para perfektamente riba e mésun liña.

Dia 26 di februari di 1998 sí nan lo bai para riba e mésun liña i nos lo haña na algun lugá riba Tera, inkluso Kòrsou, un eklipse total di Solo.

Eklipsenan ta pertenesé na 'famianan' ku siertu karakteristiká ku astronomonan ta yama *Seri di Saro*. Nos eklipse ta miembro number 51 dje 73 eklipsenan dje *Siklo di Saro 130*, ku a kuminsá dia 20 di ougústes di aña 1906 ku un eklipse parsial serka di polo sùit i ku lo kaba dia 11 di novèmber di aña 2430 ku un eklipse parsial serka di polo nòrt.

E eklipse total di 1998 akí ta proyektá un sombra ku ta kuminsá den Oseano Pasífiko, serka di Islanan Marquise (Polinesia franses), pasa riba Islanan Galápagos, Colombia, Venezuela, Kòrsou i bai kaba den Oseano Atlántiko serka di Islanan Canaria, den un rekorido total di mas o ménos 12.000 kilometer, den algu mas ku kuater ora.

Pa Kòrsou e liña sentral dje eklipse ta pasa na solamente 28 km nòrtost di Saban'e Wespen, loke ta duna e punta akí un totalidat di 3 minüt i mei, banda di 2or i 13 di mèrdia. Durante e tempu akí Luna lo tapa Solo totalmente i nos lo por mira e korona solar presioso sin niun problema.

E promé kontakto ku nos por mira entre Luna i Solo, ora kuminsá paresé un mordé chikitu n'e rant wèst di Solo, ta tuma lugá na Saban'e Wespen 12:41 p.m. E di dos kontakto, òf inisio dje totalidat ta 2:11 p.m. ku ta dura te 2:15 p.m. ora e di tres kontakto òf fin dje totalidat tuma lugá. E di kuater kontakto, ku ta marka fin dje eklipse, lo ta 3:37 p.m. E total di minüt pa otro partinan di nos isla ta indiká riba e e skema ku ta sigui.

Lugá na Kòrsou	Promé kontakto ora:min:s	Di dos kontakto ora:min:s	Di tres kontakto ora:min:s	Di kuater kontakto ora:min:s	Durashon di Totalidat min:s
Wespen	12: 40: 43	14: 11: 26	14: 14: 56	15: 37: 07	3: 30
Lagun	12: 40: 39	14: 11: 26	14: 14: 50	15: 37: 05	3: 24
Santa Krus	12: 40: 39	14: 11: 28	14: 14: 49	15: 37: 05	3: 21
Soto	12: 40: 41	14: 11: 32	14: 14: 37	15: 37: 06	3: 16
Barber	12: 40: 48	14: 11: 39	14: 14: 52	15: 37: 10	3: 13
San Wilibròdu	12: 40: 44	14: 11: 44	14: 14: 41	15: 37: 07	2: 57
Hato	12: 40: 59	14: 12: 08	14: 14: 42	15: 37: 16	2: 34
Julianadorp	12: 40: 54	14: 12: 07	14: 14: 34	15: 37: 12	2: 27
Willemstad	12: 40: 55	14: 12: 23	14: 14: 21	15: 37: 13	1: 58
Santa Katarina	12: 40: 15	14: 12: 42	14: 14: 36	15: 37: 25	1: 55
Niport	12: 40: 08	14: 13: 17	14: 13: 49	15: 37: 20	0: 32

Durante e totalidat, entre e di dos i e di tres kontakto, bo por mira Solo sin nuin problema ku wowo, vèrekeiker, teleskop, kámara pa saka potrèt òf pa vidio. Pero di e promé pa e di dos kontakto i tambe di e di tres pa e di kuater, ke men durante e fasanan parsial, ora solo no ta tur tur tapá, bo mester mira e eklipse via proyekshon, òf uza un mirasolo profeshonal pa kuida e kos mas balioso ku bo tin, esta bo wowonan.

Preparabu na tempu pa disfrutá di un dje eventonan mas bunita ku Naturalesa ta ofresé i ku ta presentá kasi solamente un bes den bida di un hende.

BNA-DIG-POSTER-0068 | Biblioteca Nacional Aruba - Coleccion Digital
Requests/Info: digital@bibliotecanacional.aw | Source: http://digital.bna.aw

